

Iglesia Maranatha Aruba ta celebra su 30 aniversario den grandi



Oranjestad- 30 di October 2013—Iglesia Maranatha e aña aki ta celebrando 30 aña na Aruba den grandi. Na aña 1983 Iglesia Maranatha a cuminsa na Pitastraat na cas di Sra. Winie Kandan. E nomber di Maranatha a nace for di e versiculo den bijbel 1 Korintionan 16:22. Maranatha ta nifica “Cristo ta bin pronto”. Despues di un aña Iglesia Maranatha a bay bou di un tent situa na Potreroweg, Dakota banda di e cas di mayornan di Pastor Theo. Na 1985 Iglesia Maranatha a muda pa Hooiberg, akinan Dios a habri porta pa un tereno na Paradijs caminda e edificio a wordo construi. Na mei aña 1986, Iglesia Maranatha a tene su prome sirbishi na Paradijs y te cu e dia di awe pa e bondad di Dios, Iglesia Maranatha ta situa na Paradijs. Dia 26 di November 1986,

Pastor Theo & Nelly Orman a wordo instala como pastoor di Iglesia Maranatha Aruba. Prome cu esaki, Pastor Theo y Nelly Orman a traha pa hopi aña, como lideman di hubentud. Segun cu e iglesia tabata sigui crece e trabou pastoral tabata existi cada biaha mas tempo di Pastoor Theo. Na 1989 Pastoor Theo a tuma e decision pa stop cu su trabou secular pa asina e dedica mas tempo pa e trabou di Dios na Iglesia Maranatha Aruba. Durante e celebracion di nos 10 aña na 1993, a nace e titulo Celebra Cristo; un campaña evangelistico cu ta wordo organisa tur aña hunto cu tur e nacionnan den Iglesia Maranatha Aruba. Segun cu e hendenan tabata keda yena e edificio a yega e momento cu no tabata tin lugha mas pa pone hende, pa e motibo aki, mester a habri tentnan pafo,



banda di e edificio tanto den nos sirbishinan di diadomingo mainta y anochi. E miembronan hunto cu nos Pastoor Theo a sigui traha duro pa asina, construi un edificio mas grandi pa acomoda mas hende. Nos a organisa varios fundraising y cu donacionnan di miembronan nos a logra pa celebra dia 21 di juni 1998 e apertura di e edificio nobo y amplio cu espacio pa acomoda tur e ministerionan di iglesia.

Pastor Theo den oracion a pidi pa Dios manda personanan cu por yuda carga y hiba e vision dilanti. Na cuminsamento di 1998 e oracion aki a bira realidad caminda cu Pastoor Marcondes & Ana Borges a wordo instala como co pastor di Iglesia Maranatha Aruba. Despues di tabata un sosten hopi grandi pa Iglesia Maranatha Aruba, Pastoor Marcondes y famia a emigra pa Hulanda, awe nan ta pastoor na Iglesia New Life Christian Center Maranatha na Den Haag y Spijkenisse, Rotterdam.

Pastor Theo y Nelly na aña 2006 a sigui desaroya nan mes haciendo teologia y consehera y terapia familiar, cu ta wordo duna pa Miami International Seminary (MINTS) hunto cu Instituto Medico y psicológi-

co con atencion a la Familia (IMFA). Pastor Theo a sigui specialisa su mes y a termina su doctorado na 2009 y 2011 a gradua pa su PhD den teologia.

Iglesia Maranatha tin como vision pa ta un cas di oracion y refugio pa henter famia di Aruba. Nos mision ta pa brinda e pueblo di Aruba e yudansa necesario pa forma ciudadanonan efectivo.

Pa celebra tur e aña nan aki di experiencia y logronan y pa duna Dios na prome lugha danki pa su fidelidad na nos. Iglesia Maranatha tin 3 dia di celebracion, cada dia lo tin un programa diferente y varia. Dia 1 di november nos

lo cuminsa pa 7or di anochi pa un anochi di alabansa y cu bendemento di cuminda di 10 diferente nacion, representa den Iglesia Maranatha. Dia 2 di november pa 7or di anochi, Pastor Theo Orman lo presenta su buki titula : “Construyendo e Iglesia” por cumpra e buki e anochi aki mes y Pastoor Theo lo t’ey pa firma e buki.

Dia 3 di november pa 4:30 atardi nos lo clausura e celebracion cu un atardi di gradicimento na Dios pa Su Fieldad. Iglesia Maranatha ta invita pueblo di Aruba den nomber di Pastor Theo y Nelly Orman pa join nos den e celebracion aki. □

